



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.533/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Faton Ademi kryesues, Milena Đerić dhe Adnan Konushevci anëtarë, me pjesëmarrjen e Zyrtarit së Lartë Ligjore Valbona Millaku Foniqi, duke vendosur lidhur me apelin e parashtruar nga Blerim Hyseni, kandidat për anëtarë të Kuvendit Komunal në komunën e Vushtrrisë, nga subjekti politik Lidhja Demokratike e Kosovës (LDK), dega në Vushtri, paraqitur kundër Komisionit Qendror të Zgjedhjeve (KQZ), për shkak të largimit nga lista e kandidatëve për pjesëmarrje në Zgjedhjet Lokale 2021, si kandidat për anëtarë të Kuvendit Komunal në Podujevë në seancën e panelit të mbajtur me 27.08.2021, mori këtë:

V E N D I M

HUDHET si i palejuar apeli i evidentuar si Anr.533/2021 e datës 25.08.2021 i parashtruar nga Blerim Hyseni, paraqitur kundër Komisionit Qendror të Zgjedhjeve (KQZ), për shkak të largimit nga lista e kandidatëve për pjesëmarrje në Zgjedhjet Lokale 2021, si kandidat për anëtarë të Kuvendit Komunal në Vushtri, nga radhët e subjektit politik Lidhja Demokratike e Kosovës (LDK), dega në Vushtri.

A r s y e t i m

Parashtruesi i apelit Blerim Hyseni, kandidat për anëtarë të Kuvendit Komunal në Komunën e Vushtrrisë, nga radhët e subjektit politik LDK, me datën 25.08.2021, ka paraqitur një apel në PZAP, kundër Komisionit Qendror të Zgjedhjeve (KQZ), me të cilin pretendon se me datë 24.08.2021 rreth orës 13:45 minuta është informuar nga kryetari Xhafer Tahiri që nuk mund të certifikohet si kandidat për asamble komunale për shkak se i figurojnë dy dënime përkatësisht me Nr.5264/2018 dhe 3489/2013. Me tutje parashtruesi i apelit thekson se në bazë të këtyre dy dënimeve ka bërë kërkesë pranë Gjykatës Themelore në Prishtinë, ku sot me datë 25.08.2021, ka marrë vërtetim nga Gjykata që aktgjykimet e tilla nuk paraqesin pasojë juridike, dhe si të tilla janë shlyer nga evidenca.

Parashtruesi ka bashkangjitur apelit kopjet e shkresave: Vërtetim nga Gjykata Themelore në Prishtinë, Kërkesat për fshirje nga evidenca, Aktgjykimet me nr.P5264/2018 dhe P 3489/2013.

Me datë 25.08.2021 PZAP, i ka paraqitur KQZ-së kërkesë për përgjigje duke kërkuar që të paraqesë përgjigje në ankesë deri me datë 25.08.2021 ora 16:00.

KQZ-ja, në përgjigjen në ankesë ka theksuar, se ka kërkuar nga Këshilli Gjyqësor i Kosovës (KGJK), që të bëjë verifikimin e kandidatëve që marrin pjesë në garë zgjedhore për Zgjedhjet Lokale që do të mbahen me 17 tetor 2021, nëse të njëjtit janë dënuar me aktgjykim të plotfuqishëm nga Gjykatat e Republikës së Kosovës. Në këtë rast Blerim Hyseni, kandidat për anëtarë të Kuvendit Komunal në komunën e Vushtrisë, nga subjekti politik Lidhja Demokratike e Kosovës (LDK), dega në Vushtrri, nga të dhënat e pranuar nga Këshilli Gjyqësor i Kosovës, në listën e Kandidatëve të subjektit politik LDK, rezulton të jetë shpallur fajtor për vepër penale me vendim përfundimtar të gjykatës në tri (3) vitet e fundit.

Komisioni Qendror i Zgjedhjeve në përgjigjen e parashtruar ka sqaruar se subjektit politik LDK për kandidatin e cekur me lart i është dhënë afat për të dërguar zëvendësimin me 25 Gusht në ora 16:00, në Zyrë.

Paneli, pasi që shqyrtoi dhe vlerësoj të gjitha pretendimit e apelit, në kuptim të nenit 117 par.2 të LZP-së, gjeti se:

Apeli është i palejuar

Paneli, vlerësoi lejueshmërinë e apelit dhe ka ardhur në përfundim se i njëjti i plotëson kushtet e përcaktuara me nenin 122 të LZP-së dhe nenin 10 të Rregullës Nr. 02/2015- Rregullat dhe Procedurat e PZAP-it.

Paneli, konstaton se pretendimet ankimore të parashtruesit të apelit Blerim Hyseni për mos largim nga lista e kandidatëve për pjesëmarrje në Zgjedhjet Lokale 2021, si kandidat për anëtarë të Kuvendit Komunal në Vushtrri nga subjekti politik Lidhja Demokratike e Kosovës (LDK), dega në Vushtrri, nuk mund të jetë objekt i vlerësimit në këtë fazë të procesit zgjedhor, për faktin se, KQZ-ja, ende nuk ka marrë vendim lidhur me certifikimin apo mos certifikimin e kandidateve të subjekteve politike, ashtu siç del edhe nga vet përgjigja në ankesë nga ana e KQZ-së, e parashtruar më datën 25.08.2021. Kërkesa e ZRPPC-së, drejtuar subjekteve politike për zëvendësim të kandidateve të tyre nuk është ndonjë vendim nga KQZ-ja, por është një kërkesë nga ZRPPC-ja, në lidhje me rastin në fjalë, ku subjektit i është kërkuar që ti zëvendësoj kandidatet e caktuar.

Kërkesa e ZRPPC-së, drejtuar subjekteve politike për zëvendësim të kandidateve të tyre nuk është vendim i KQZ-së, ndaj të cilit lejohet apeli, por është një kërkesë nga ZRPPC-ja, në lidhje me rastin në fjalë, ku subjektit është njoftuar se kandidati në listën zgjedhore pas verifikimit nga ana e KGJK-së nuk është i përshtatshëm sipas Ligjit, dhe subjekti ka mundësi ta zëvendësoj me ndonjë kandidat tjetër brenda një periudhe te caktuar para se te rekomandohet nga zyra në fjale certifikimi apo mos certifikimi i listës se plote të kandidateve. Pra faza kur është parashtruar apeli është e parakohshme sepse nuk kemi vendimmarrje të KQZ-se, për certifikim të subjektit

dhe listës se tyre, por kemi vetëm zëvendësim nga subjekti të cilit i përket apeluasi, dhe se subjekti nuk është i obligueshëm të beje zëvendësimin e kandidatit nëse vlerëson se të gjithë kandidatët janë të përshtatshëm konform nenit 29 të LZP-së.

Meqenëse në rastin konkret nga ana e KQZ-së nuk është marrë vendim lidhur me këtë çështje juridike, prandaj paneli vlerëson se nuk është nën juridiksionin e këtij institucioni që në këtë fazë të procesit , të vendosë lidhur me kërkesat e ZRPPC-së, ngase sipas nenit 122 par.1 pikat a), b), c), d), e) dhe f) të LZP-së, PZAP-i, vendos vetëm për vendime të KQZ-së, të cilat përfshihen shprehimisht në dispozitën e sipërshtuar. Në këtë rast, nga ana e KQZ-së nuk është marrë vendimi lidhur me certifikimin apo refuzimin e kandidatëve të caktuar të subjekteve politike, andaj u vendos si në dispozitiv të këtij vendimi.

Hudhja e ankesës së ankuesit në këtë fazë të procedurës, mbi këtë bazë nuk cenon të drejtën e ankuesit që pas certifikimit ose periudhës së kundërshtimit për certifikim nga ana e KQZ-së, të paraqes sërish ankesë, nëse konsideron se i është cenuar e drejta e pretenduar.

Prandaj, nga arsyet e theksuara më lart si dhe duke u bazuar në dispozitat e nenit 117 par.3, 118 par.1, 122 par.1 pika b) të LZP-së, si dhe nenit 11 par.6 të Rregullës Nr.02/15 të PZAP-it, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

A nr. 533/2021 më datën 27.08.2021.



Këshillë Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimimit të këtij vendimi.